

Universitäts- und Landesbibliothek Tirol

Viam Regiam Lvsatiae Svperioris

Schwartz, Johann Friedrich

[Wittenberg], 1732

XXVI

XXVI.

Sed relictis his, quæ satis prolixè pertractavimus, progredimur ad illos, qui pontes extra viam publicam fecerunt, permiseruntque, ut peregrinantes, ex Polonia & Silesia venientes, ope illorum Quissum transirent, iterque inde per Lusatiam inferiorem prosequerentur. Fuerunt autem ejusmodi pontes Siegersdorffii, Tonndorffii & Klitzdorffii. Quos cum detrimento esse viæ regiæ intellexisset JOANNES GEORGIUS II. constituit, ut ii sub pœna 50. aureorum vectibus remissariis occluderentur, adeoque peregrinantes impedirentur, vetita via incedere. Sed cum præter spem voluntati Principis obtemperatum non fuisset, denique nostris temporibus ad Regis aures pervenisset, horum pontium ope diverticula invenire mercatores & aurigas, vectigaliaque defraudari, justissima indignatione motus anno 1708. mandavit, ut dejectis, qui exstructi essent, pontibus, nullus in posterum vel lapideus vel ligneus in illo flumine fieret, pœnamque centum aureorum in refragantes constituit. Et licet illi postea, ad quos pontes pertinebant, suppliciter orarent, ne hi deicerentur, rex tamen optimus voluntatem non mutavit, sed saltem permisit, ut loco pontium dejectorum alii subitaneo opere, nec tamen transmittendis curribus onustis idonei, conficerentur.

XXVII.

Frequentiorem viæ nostræ usum impedivit aliquando pestilentia, quæ subinde pervasit illas regiones & urbes, ad quas peregrinantes hac via ducuntur. Movit id proficiscentes, ut, cum imprimis Naumburgum, oppidum ad Quissum flumen situm, tetigisset contagiosus morbus, relicta hac urbe & Lauba, via per silvam, quæ vulgo die *Heyde* dicitur, jam olim anno 1601. ab ABRAHAMO, Burggrafio Donaviæ, reprobata incederent. Postea vero quam morbus hic fatalis ex regione ista abiit, GERSDORFIVS præses illos in viam redire jussit, his verbis usus : Des